

Zeitschrift: Annalas da la Societad Retorumantscha

Herausgeber: Societad Retorumantscha

Band: 77 (1964)

Artikel: Famiglia e giuventetgna da P. Placi Spescha

Autor: Müller, Iso / F.M. / Spescha, Placi

DOI: <https://doi.org/10.5169/seals-226716>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 23.08.2025

ETH-Bibliothek Zürich, E-Periodica, <https://www.e-periodica.ch>

Famiglia e giuventetgna da P. Placi Spescha

da P. Iso Müller

Versiun rom. da F. M.

1. *La famiglia*

Ins sa sortir mo dal document dils 30 d'october 1664, tras il qual Christian Spescha vegn declaraus e recepius burgheis dalla Casa da Diu, dalla Cadi. Siu tat era gia avon biars onns vegnius dad Andiast e secasaus a Trun¹. Ordlunder savein nus concluder, chi'l schendrader da quella lingia, che interessescha nus cheu, ei serertratgs naven dad Andiast, dertgira aulta da Vuorz, e secolocaus a Trun entuorn ils 1600. Siu prenum ei a nus buc enconuschents. Ual Trun, la beinstonta vischnaunca egl orient dalla Cadi, ha enconuschentamein tratg neutier da bia jasters². Schebein gia Flurin Spescha († 17 schaner 1668) e sia consorta Anna († 27 nov. 1669) appartegnan a quella famiglia ei buca segir. Persuenter savein nus ch'in fegl dil fundatur dalla lingia senumnava Christian Luregn. El compara numnadamein adina sco tat els acts da batten da ses beidis. Christian Luregn ha dus fegls: Giachen e Christian Spescha³. Igl emprem ei vegnius ordinaus spiri-

¹ Original egl archiv claustral a Mustér. Regest da W. Derichsweiler en: Bündner Monatsblatt 1931 pg. 316 s. Cheu ei era la genealogia dils Spescha, che nus vein compleatau ord ils eudischs parochials da Trun.

² I. Müller, Die Abtei Disentis 1655—1696, 1955, pg. 447 s.

³ I. Müller, Die Abtei Disentis 1696—1742, 1960, pg. 24 (ord ils acts dalla Cadi) P. Placi Spescha porta tscheu e leu exempels per l'ascendenza el romontsch (Vater = bab eav.). Pieth-Hager, P. Placidus Spescha, 1913, pg. 505 tier 1805. Leutier drova el sco prenums quels da sia famiglia tochen tier Christian Spescha-Tiron (1664). Sche el ha lu plinavon priu ils numbs Benedetg e David per igl urat ed il schendrader dalla lingia, sche ha el bein inventau el conex quels numbs, essend ch'el vuleva mo exponer ils grads da parentella en general.

tual 1649 ed ha lu surviu sco caplon a Trun 1641—1651 e lu a Sumvitg, igl emprem sco vicari 1656—1658 e lu sco plevon 1658—1680⁴. P. Placi Spescha enconuscheva aunc scartiras theologicas da quel, las qualas secattavan egl archiv claustral a Mustér. Essend che quellas ein buca pli avon maun, san ins era buca contollar, schebein il laud che P. Placi dat a quellas ei giustificaus⁵. Christian Spescha, il frar da sur Giachen, ha contonschiu dagl avat da Mustér, Adalbert II. da Medell, igl onn 1664 la recepziun sco burgheis dalla Cadi⁶. Siu bab e siu tat eran pia mo domiciliai e buca legalmein protegi commembers dalla dertgira aulta dalla Cadi. Christian ha maridau ina Barla Tiron, dalla quala el ha giu treis feglias ed in fegl Johannes. Quel, numnaus cuort e bien Jon u Gion, ei vegnius battegiaus ils 9 de matg 1669 a Trun. Padrin ei staus il canoni e plevon da Trun Joannes de Turre (Latour) e signura Margarita Casanova, la dunna dil Stalter Giachen Casanova, ha funczionau sco madretscha. Il Gion ei vegnius enzinnaus en ils 5 de nov. 1709, pia pér da 40 onns, cun Margharita Gelli Vincenz da Schlans, ed il plevon da Schlans, Pieder Caduff e Pader Carli Decurtins, che era da quellas uras beneficiat a Nossa-donna dalla Glisch, ein stai perdetgas da quella copulaziun, ferton chi'l plevon da Trun, Gion de Castelberg, ha benediu quella lètg. Ils 15 da settember 1712 ha quella giuvna lètg giu ina poppa cul num Onna ed ils 9 da sett. 1724 in fegl Pieder Luregn. Ils 21 da nov. 1751 ha quei Pieder Luregn maridau ina Onna Maria Genelin⁷. Pieder Luregn sez ei morts 1766, sco la tabella de mortoris, conservada aunc oz el museum da Trun, documentescha.

Alla nova uniun matrimoniala nescha sur onn, ils 8 da december 1752, in fegl che ei vegnius battegiaus l'auter di, ils 9 da december

⁴ Annuari dalla societad historic-antiquara grischuna 50 (1920) 47.

⁵ Pieth-Hager, P. Placidus a Spescha, 1913 pg. IX. (Nus citein l'ovra mo cun: Spescha).

⁶ Mira remarka 3.

⁷ Derichsweiler 1.c. pg. 317 indichescha sco geniturs Gilli e Catharina vulgo Trina Cagenard e sco datum da naschientscha ils 14 da favrer 1723. Per quei di ei inscret: Anna Maria nata ex Gelli Genelinus et Elsa eius legitima (uxor). Facticamein compara in Anton Cagenard 1799 sco «pli tier parent» da Spescha a Trun. Spescha 122. El medem liug menzionescha P. Placi sia mumma dad 80 onns.

Genealogia da P. Placidus Spescha

*Antenat ca. 1600
da Andiast a Trun*

Christianus Laurentius

Jakob († 1680)
plevon

Christianus
«Gotteshausmann» 1664, maridaus cun
Barbara Tiron

Anna Maria
n. 1666

Gretta
n. 1667

Johannes
n. 1669
maridau 1709 cun
Gretta Gelli Vincenz

Anna
n. 1671

Anna
n. 1712

Petrus Laurentius
1724—1766, maridaus 1751 cun
Anna Maria Genelin

Julius Bapt.
n. 8. Dez. 1752
(P. Placidus)

Maria Katharina
n. 10. März 1755

Joh. Jakob
n. 25. Juli 1758
maridaus cun Mar. Kath. Luz

Maria
n. 24. Juli 1761

Christian Laurent
n. 17. April 1765

ella baselgia parochiala da s. Martin e che ha leu survegniu il num Gieli Battesta⁸. Apparentamein ha el survegniu il num Gieli suenter siu padrin Gieli Vincenz, che era in frar dalla tatta da Spescha. Madre-tscha ei stada Onna Maria Carigiet. Cura ch'igl uestg Gion Anton da Federspiel ha cresmau a Trun igl onn 1759, ha era «Julius Paptista Spescha» ritschiert il Sacrament dil s. Spert, nua che in «Str. (= Statthalter) Conradus» ha funczionau sco padrin. Carteivel era «Joannes Jacobus Spescha», che ei medemamein vegnius cresmaus e che ha giu padrin in «Dominus Thomas Riedi», in frar pli giuven da nies Gieli. En scadin cass haveva P. Placi Spescha aunc dus frars pli giuvens, in cul num Gion Giachen, l'auter Christian Luregn⁹. Gion Giachen ei maridaus cun ina Maria Catrina Lutz. Quella lètg ei stada benedida cun dus affons, in Pieder Giusep, naschius ils 10 de matg 1788, e l'auter, Anna Maria, naschida ils 17 da nov. 1789. Dasper ses dus frars haveva P. Placi aunc duas soras. L'entira genealogia astgas pia sepresentar secund il schema allegau.

2. *Il crap-fossa da famiglia*

La genealogia da P. Placi Spescha savein nus contollar vid il *crap-fossa de famiglia*, aunc existent; el secatta el museum Cuort Ligia Grischa a Trun. La platta ei 121 cm àulta e mesira en sia part sissum 69 e giudèm 87 cm ladezzia. Il crap porta la suondonta inscripziun en letras maiusclas, sco nus nudein cheu exactamein.

⁸ Il cudisch parochial da Trun Nr. 4 indichescha mo il di dil batten, dafertont che Spescha ha nudau en sia autobiografia il di da naschientscha. Rätoromanische Chestomathie ed. C. Decurtins tom 4 (1911) 674. La leu, pg. 674—676 restampada pintga autobiografia, sco nus numnein ella cheu, ei prida ord l'ovra da Spescha: Literatura Grisuna vaedra e nova, screta 1805.

⁹ Spescha, 100, 122, 315, 455 per Johann Jakob (1799). Spescha 146 ed Acta Capitularia I. 77, 84 per Christian Laurentius (1804).

NODA À CASA

OREMU(S) DOMINO. PETRUS LAUREN(TIUS)
SPESHA DIE XI NOV(EMBRIS) AN(N)O
1766. PATER IULII IO(ANN)IS BAP(TISTAE),
IO(ANN)IS IAC(OBI) ET CHRIST(IANI) LAUR(ENTII),
QUI FUIT IOANNIS ET CHR —
ISTIANI EX SPECIIS DE
ANDESTE AN(N)O 1644. DE
QUORUM PROGENIE FIT
MENTIO IN TESTAMEN —
TO TELLONIS EPISCUP(I)
AD AN(N)UM 767. REQ(UIESCAT). UN(A)
CU(M) UXORE SUA ANN(A) MAR(IA)
IN PACE. SIU TESTAMENT
SEIES PARINA, ARTEI TOTINA,
NE PRERS NE SIGNIURS. VEGNI.....A.
SALWEI IL DUN DIL SEGNIOR: BION UOR-
DEN E GIUSTIA. MES DE
PIEDER IOS. SPESHA. SCALPRA(U)
DE IOAN BAT(TEST)A POLTI.

Sco ins vesa immediat ord il lungatg ed ord la scartira, consista la legenda ord duas parts, ina latina pli veglia ed ina romontscha pli giuvna, ch'ei pér pli tard vegnida admessa. Nus prendein en egl igl emprem la *part veglia*. Ella entscheiva cun la noda-casa dils Spescha, in A grond encorunaus d'ina crusch¹⁰. La schinumnada arma dils Spescha cun dus pèschs entuppein nus pér in bien ton pli tard. Igl ei, ton sco nus savein oz, quella vid ina fenestra d'armas dalla Scala dil Rusari en claustra a Mustér¹¹. Igl Oremus Domino indichescha buc ina latinitad classica. Lu suonda il num Petrus Laurentius Spescha, morts ils 11 da november 1766, che vegn caracterisaus sco bab da treis affons, numnadamein da P. Placi e ses dus frars. Silsuenter menzionescha l'inscripziun il tat Johannes ed il basat Christian. Quei con-

¹⁰ Spescha 505 declara quest'enzenna: «Dils morts dad Andiast».

¹¹ G. Casura, Bündner Wappenbuch des Vorderrheintals 1937 pg. 53.

stat cun ils ulteriurs documents. Igl onn 1666 indichescha che Christian Spescha, il tat da P. Placi, ei daventaus quei onn burgheis dalla Cadi. E lu la interessanta remarca, che la schlattina Spescha seigi gia menzionada el testament digl uestg Tello da 767. Pér lu suonda la menziun dad Anna Maria Genelin, la consorta da Pieder Luregn Spescha. Ei setracta cun quei pia buca d'in crap-fossa, ch'ins havess tschentau immediat suenter la mort da Pieder Luregn Spescha 1766, mobein d'ina specia da tabla d'antenats u crap da famiglia, el qual era ils affons aunc vivents ein inscrets e cun il qual era la veglia e venerabla derivonza dalla schlattina dad Andiast duei vegrir tratga alla glisch. Ei vegr cheu simplamein indicau il «specius de Andeste», sco el compara el testament da Tello, per antenat¹². Quei revelescha gia in agen patertgar. Cheu ei stau vid la laver in amateur-scienciat sin intschess historic-filologic e buca in pur da Trun da mintgadi. Tgei schai pli maneivel che da veser enten P. Placi Spescha sez igl autur da quella inscripziun! El datescha gie era il testament da Tello buca cun 765, sco ei havess udiu, mobein cun 766 e 767 e considerescha quei specius da Andeste sco siu antenat¹³.

Facticamein ein ils motivs, sils quals P. Placi sefundescha pli che mo dubius. *Specius* significescha en latin medieval il habitont d'ina parzella funs¹⁴. Quei era da quei temps segir aunc buca in num da famiglia u schlattina. Quels numbs comparan pér in bien ton pli tard. Mo ins sa era buca unir Spescha cun Specius, pertgei specius dess en Sursilvan spetsch u spietsch, tenor dir da dr. Andrea Schorta, Cuera. Spescha ei biaronz in num da famiglia, che dariva d'in hof Spescha. Il de u da da derivonza ei cheu simplamein curdaus naven. Semiglions numbs da famiglia ein Depuoz, Chresta, Baselgia eav. Il num local Spescha sez vegr neu dal latin spissia = spessadad, che va da sia vart puspei anavos sigl adiectiv latin spissus = spess. Spescha e Speschas ella significaziun da spessom dat ei a Cuera, Tschappina, Ftan, mo era en Surselva, sco a Flond, Vuorz, Rueun eav. Sco num da famiglia vegr Spescha avon ad Andiast 1377, a Trun la fin dil

¹² Bündner Urkundenbuch I (1955) 18, lingia 25. Il text ei era tier A. Eichhorn: Episcopatus Curiensis 1797, Cod. prob. pg. 8.

¹³ Spescha IX e 4 s., leutier la legenda da siu portret all'entschatta dil cudisch.

¹⁴ Bündner Urkundenbuch I (1955) 489, leutier Spescha, pg. IX e 5.

15. tsch. ed a Breil 1533¹⁵. Cun quei croda la hipotesa da P. Placi en sesezza, resta denton tuttina ina enzenna da siu spert allert. Cun quei che P. Placi era perschuadius, che sia famiglia sappi mussar ora siu origin ad Andiast gia egl 8avel tschentaner, po el haver giu in grond plascher da quella genealogia da melli onns ed el vegn ad haver anflau ch'ei seigi uras, che sia famiglia semetti ella retscha dallas famiglias vegl-reticas. Bein perquei vegn el ad haver entschiet entuorn 1800 a sescriven mintgaton P. Placi a Spescha¹⁶. Aschia saveva el star a pèr cun P. Augustin a Porta, siu contemporan e confrar en claustra. Mo il bia tralaschava el quella midada vid siu num da famiglia. Ella ha tuttavia era buca anflau la via els documents officials¹⁷. Aschi democratics, gie Giacubin sco P. Placi era en siu patertgar, cheu era el tuttina aunc cun in pei el 18. tschentaner monarchic-aristocratic.

Suenter che nus havein resdau dalla emprema part latina dalla inscripziun dil crap-fossa, resta ei aunc dad interpretar la part giubass, il *text romontsch*. Quel sepresenta gia ton entras sia fuorma dallas letras sco entras siu lungatg sco in appendix da pli tard. Ultra da quei sesanfla el giudem sin la part pli lada dil crap, che era probabel destinada da vegnir sfundrada el tratsch per dar sostegn agl entir moument. Cura che la platta ei denton vegnida allontanada u dislocada u cun caschun d'ina certa midada ei la nova recensiu da text vegnida agiuntada. Scalprau ha ella in cert Joh. B. Polti, bein in tagliacrappa dil sid, il qual haveva dal reminent negina raschun da vuler seperpetnisar aschi grondiusamein sut las paucas, buca ual bialas lingias. Fatg il text e cummandau l'aschunta ha Pieder Giusep Spescha. Schebein quel ei identics cun Stalter Pieder Spescha dad Acladira, ch'ei inscrets el cudisch da battens da Trun sut ils 21 da matg 1808 sco bab d'in affon Joseph Anton, san ins buca segir. Il cuntegn dalla aschunta para da sereferir sin il testament da Pieder Lu-

¹⁵ A. Kübler, Die romanischen und deutschen Oertlichkeitsnamen des Kantons Graubünden, 1926, pg. 194 nr. 1422, leutier: Rätisches Namenbuch, Personennamen, en preparaziun da A. Schorta, Cuera.

¹⁶ Spescha 407 (1800), 394 (1812), 354 (1822).

¹⁷ Aschia stat ei els acts officials «Acta Congregationis» VI, 483—484, 548 per 1785 e 1788 adina mo: P. Placidus Spescha. Medemamein en biars loghens das ovras. Cp. Spescha 256, 261, 265, 277, 280, 290, 437, 451, 459, 460, medemamein la suttascripziun sut il maletg davontier dil medem cudisch.

regn Spescha, morts 1766. Schebein quei text stava aschia verbalmein en siu testament, ni schebein mo la tradiziun ha attribuiu quei ad el, selai buca eruir. Ei retracta da proverbis e principis. Aschia legin nus: «Seigies perina, artei tuttina, prers ni signurs». Plinavon anflein nus il principi: «Bien uorden e gustia». Talas formulaziuns eran da casa tier ils romontschs. Ei seigi mo regurdau alla formulaziun, rimnada da C. Decurtins: «prers e signurs»¹⁸. El connex ha l'entira aschunta forsa il senn, che Pieder Luregn Spescha († 1766) hagi vuliu, che siu fegl P. Placi dueigi obtener sia part jerta. Denton possedein nus, bein pervia dil barschament da 1799, negin special document per confirmar questa interpretaziun.

3. Ils onns da giuventetgna tochen 1782

Cun 10 onns ha Gieli Battesta frequentau la scola, nua ch'el ha empriu en treis onns da leger, scriver e quintar. Cun 13 onns, pia 1765 eis el vegnius el *seminari a Cuera*¹⁹. Quei ei il schinumnau Seminari Pign, che ei vegnius eregius 1659 cun ils mieds dalla claustra da dominicans da S. Clau a Cuera. Quella scola steva sut la survigilanza dil scolasticus catedral, il qual da sia vard procurava per in preceptur per la scola²⁰. Gia in tschentaner pli baul haveva Adalbert Defuns, igl posteriur avat da Mustér, studigiau en quella scola si Cuort a Cuera²¹. Spescha ha empriu a Cuera, tenor siu agen dir, en in onn il lungatg tudestg. En scadin cass eran ses progress aschi vesivels, ch'il caplon curial da lezzas uras, sur Thomas Romonini, ei sededicaus ad el personalmein ed ha dau ad el uras da latin e musica²². Spescha era denton buca il sulet scolar ch'ei vegnius promo-

¹⁸ C. Decurtins, Rätoromanische Chrestomathie 4 (1911) 1011 nr. 326.

¹⁹ «son iou vegnius termaess a Quera ent' il Seminari». Autobiografia 674.

²⁰ O. Vasella, Aus der Geschichte des katholischen Schul- und Bildungswesens der Stadt Chur. Scartira festiva dalla uniu da scola catolica grischuna 1945 pg. 60 s.

²¹ I. Müller, Die Abtei Disentis 1696—1742, 1960, pg. 672.

²² Autobiografia 1. c. pg. 674. Il settember 1767 ha Th. Romanin accompignau uestg Gion Antoni de Federspiel sin siu viadi da visitaziun el Vintschgau. J. G. Mayer, Geschichte des Bistums Chur II, 1914 pg. 466.

vius; el ha perinaga partiu quei avantatg cun *Aluis Jost*, il fegl dil cancelier episcopal²³. Quel era il cusseglier laic digl uestg da Cuera, Gion Gieri Jost, era numnaus cancelier curial. El cumpignava igl uestg sin sias visitasiuns, sco p. e. 1767 e 1779²⁴. Il medem onn 1779 compara quel sco «Regimentsrat» e «Freilandrichter» a Stockach sper Constanza²⁵. Siu fegl Luis era pia conscolar da Spescha a Cuera. Quei Luis Jost era ual aschi originals sco nies Gieli Spescha. El ei naschius 1759 sin l'insla Corsica, essend che siu bab era da quei temps capitani el regiment grischun da Genua. El veva in temperament empau sanguinic e violent ed ei entraus 1789 en survetschs franzos, tier la cumpignia da guardia, sut il commando da barun Heinrich da Salis/Zir. Il medem onn ha Jost fatg atras la revoluziun franzosa e la declaraziun dils dretgs humans, eveniments che han tschaffau el. Ussa ha el tschentau per finemira da liberar sia cara patria grischuna dal giuv aristocratic dalla famiglia Salis. Da cheu darivan era sias relaziuns cun umens «sclari» sco Gion Battesta Tscharner ni cun officiers revolucionars sco Lafayette e Doumouriez²⁶. Ins sedamonda, pertgei ual Spescha e Jost hagien nutriu pli tard las medemas simpatias per la Frontscha e schebein els seigien buca omisdus vegni fructificai dal schierm spirtal per lur posteriura tenonza gia sil baun da scola a Cuera u silmeins gia leu preparau enzaco lur mentalitad da pli tard.

Igl onn 1770/71 sesanfla Spescha buca pli a Cuera, mobein a *Mals e Tartsch* egl Obervintschgau. Bein era quei territori vennius 1618 facticamein e 1665 legalmein sut Habsburg ed aschia sligiaus dal do-

²³ «Miu kondiscipul aei staus: Aloysius Jost, figl d'il consigler episkopal». Autobiografia 1. c. pg. 674.

²⁴ J. G. Mayer, Geschichte des Bistums Chur, 1. c. pg. 466, 483.

²⁵ Bündner Monatsblatt 1958, pg. 155 s., tenor il qual Gion Gieri Jost ha il medem onn 1779 era midau sia plazza. El era il frar dil vicari general de Cuera Gion Gieri Jost, morts 1763. Tuor, Domherren 1905 pg. 49 (Annuari dalla societad historic-antiquara grischuna, tom 34, annada 1904).

²⁶ Cuorta biografia, prida ord acts digl archiv d'uiara franzos, da C. R. Delhorbe en Schweizerische Zeitschrift für Geschichte 4, 1954, pg. 537—540. Cheutier A. Rufer, Aloys Jost, ein Bündner Patriot 1759—1827, 1906 pg. 5—12, 32 (= seria de scartiras dalla Neue Bündner Zeitung).

mini dil prenci-uestg da Cuera, mo la appartenenza tier igl uestgiu ei restada tochen 1803²⁷. Las relaziuns ecclesiasticas cul Tirol eran schizun stretgas, sco ins vesa p. s. ord la gliesta dils plevons da Mals. Leu anflein nus da 1750—60 in Conradin de Castelberg da Mustér, staus plevon a Fallera da 1725—1750 e canoni e decan dil capetel²⁸. Suenter sia mort a Mals 1760 suonda sco plevon da leu Giachen Adalbert de Caprez, doctur dalla teologia. El era da Trun, nua ch'el ei era staus plevon da 1739—50. Da leu eis el vegnius a Fallera 1750—61. Era el ei medemamein staus cononi e decan dil capetel. Sco vischin da Trun e sco plevon da leu enconuscheva el la famiglia Spescha. Caprez ha pastorau a Mals da 1761 tochen sia mort 1770²⁹. Ins pudess crer che el hagi contribuiu enzaco, ch'il scolar Gieli Battesta Spescha ei sereratgs da Cuera el Tirol. Tenor dir da Spescha denton ei quei oravontut daventau entras siu anterius magister Thomas Romanin³⁰. Quel era numnadamein sez da Mals, ha aschia era desistiu da siu post sco caplon curial per surprender da 1769—1792 la pasto-raziun da Tartsch. Quei era lu aunc in benefeci dependent da Mals. Romanin ha scret 1773 igl urbari ecclesiastic da Tartsch³¹. Schebein Spescha ha era absolviu uras d'instrucziun tier il plevon da Mals Jos. Bartholomäus Cont Wicka, a Mals da 1770—1782, savein nus buc, astgein mo sminar³². Duront quels dus onns ei Spescha denton buca staus sulets, mobein veva aunc in conscolar grischun cun el, in Christian Zinsli da Zir³³.

²⁷ Lexicon historic-biografic Svizzer 7 (1934) 270.

²⁸ Arriguard Castelberg mira: E. Poeschel, Die Familie von Castelberg, 1959, pg. 337—339, 521.

²⁹ Annuari della societad historic-antiquara grischuna 49 (1919) 166. Tier la genealogia: Annalas 8 (1893) 128, sco era Bündner Monatsblatt 1936 pg. 304 s.

³⁰ Autobiografia 1. c. pg. 674.

³¹ Amicablas communicaziuns da plevon Ignaz Stocker, Tartsch.

³² J. Schmied, Der Markt Malles 1942 pg. 52 cun la gliesta dils plevons. Essend ch'ils cudischs parochials da Mals ein barschai igl onn dils franzos 1799, ein tuttas retschercas a Mals stadas adumbatten.

³³ Autobiografia 1. c. 674. In Gion Battesta Zinsli ha studigiau 1746 a S. Pieder e suenter a Dillingen filosofia e teologia. F. Maissen, Bündner Studenten in Feldkirch 1650—1870. Montfort 14 (1962) pg. 96 e 101 nr. 121 e 147.

Igl onn 1771 ei Spescha entraus ella *scola claustral*. Nus havein cheu il cudisch da quens, nua nus legin il suondont passus: «Julius Spescha von Truns ist Anno 1771, den 11. Julii, auf die Schuhl kommen. Den 9. Juni 1772, da er in dz Baad ist, ihm Gelt geben 2 fl. 56 Kr., den 22. Junii ihm geben $\frac{1}{2}$ Wein 12 Kr... Jtem hac die Brodt, Käs und Supen für seinen Bruder und Vetter 12 Kr. Jtem ihm geben Gelt 3 Fl. 12 Kr.» (Rodel dils scolars 1769, p. 47). Ils 3 d'October 1774 ha el mess giu siu profess en claustra, ed ei restaus il temps suondont, tochen 1776 en claustra, per ir cheu vinavon cun ses studis. El sez scriva en sia autobiografia: «jou aera vidavon skolaus enten la Logica e Metaphysika de Monsegnur Avat Columban, d'in Om en tots graus de scienzia senze paraegl»³⁴. Era schiglioc sa Spescha nuota ludar avunda la savida da siu magister ed Avat³⁵.

Igl ei cheu buca da surveser, ch'ei existeva en claustra a Mustérina certa tradiziun en fatgs da geografia e historia naturala, la quala P. Maurus Wenzin ha fundau († 1745) e che ils Avats Bernard Franck (1742—1762) e Columban Sozzi (1764—85) han continuau³⁶. Gia la situaziun dalla claustra indichescha sin quella direcziun. Tier il giuven Spescha ei quei aunc pli capeivel, el che ei staus dals onns da mattatsch, sco pastur, unius cun la natira. Aschia eis ei gnanc da smerveglier, ch'el scriva gia 1774 u 1775 sco giuven frater sia emprema scartira sur historia naturala en lungatg romontsch, ella quala el seocupescha cun flurs ed orts. Surlunder rapporta el pli tard igl onn 1805 en sias Memorias en suondonta maniera: «Beingleiti suenter meia professiun monastika hai jou tschentau en plema grishuna las observaziuns, ke iou havaeva fatg enten la kultura de las flurs et d'ils Orts, e quaei en fuorma vaedra senze reflekziun sin novadats»³⁷. Quella lavur ei deplorablamein ida a piarder 1799. Ord igl ual citau pareri, che Spescha dat 30 onns pli tard sur da sia emprema lavur, ston ins concluder, che fr. Placi hagi lu tractau quei che schaveva il pli maneivel, bein observond tut, mo senza neginas pretensiuns scientificas.

³⁴ Autobiografia 1. c. pg. 675.

³⁵ Spescha 63 s., 105, 403.

³⁶ Pli bia surlunder ei d'anflar el capetel: Von der barocken Naturphilosophie zur neuen Naturwissenschaft, en I. Müller, Die Fürstabtei Disentis im ausgehenden 18 Jh., 1963 pg. 223—229.

³⁷ Autobiografia 1. c. pg. 674.

Da quei temps, denter 1774—76, ha Johann Anton de Buol, che ei staus da 1763—1792 ambassadur austriac el Grischun, fatg ina visita alla claustra, che era lu attaschada alla partida austriaca. En honur digl ault hosp han ils paders dau in concert. Igl ei significont, ch'ins ha per quella caschun da natira privata era tratg neutier il pader Placi Spescha. Schebein quel ha era sunau enzatgei, vegr buca menzionau, mo el para tuttina da vegr consideraus empau per in amatur dalla musica. Quest divertiment ha giu liug el «hof» quei vul dir ella sala dils hosphs dalla claustra^{37a}.

Arriguard la tenonza da nies giuven frater intervegnin nus ord ils acts da visitaziun da 1776. Ses giavischs fan ina buna impressiun. Surlunder ha il visitader nudau il sequent: Fr. Placidus Spescha «sereferescha sin ils rapports dils aultrev. Paders e sin quei ch'ei veginu detg entras ils buns, al qual era el consentescha. El selamenta, ch'el stoppi parter studi e recreaziun cun ils students, dals quals enzaconts duessan veginr scatschai pervia da lur excursiuns nocturnas. El seigi buca occupaus cun ils studis. El hagi giu sco professer igl avat (Columban Sozzi), il qual seigi denton absents pli che la mesedad digl onn. Duront quei temps seigi P. Bernard (Caviezel) veginus incarricau cun la instrucziun. Quel hagi denton absolviu siu pensum aschi lev e negligentamein, ch'el hagi strusch udiu 4 prelecziuns e dapli pastgas buca pli che 10. Mai vegini el clamaus al confess dalla cuolpa ed el seigi surschau a sesez sut igl instructer P. Decan (Celestin Cagenard). El seracamonda per studis ed instrucziun.» La visitaziun ha lu surdau al P. Gregor Bläsl il quitau per fr. Placi³⁸. Tenor quei astgein nus veser enten il giuven frater in premurau ed aviert conventional, che prendeva tuttavia serius cun la veta benedictina. Deplorablamein ei sia emprema giuventetgna claustralra curdada ual en ina malventireivla epocca, essend che avat Columban era buca habels da fructificar la veta interna claustralra dalla abbazia e da menar quella sin via da progress³⁹.

^{37a} Archiv claustral Nossadunneun ASF (30) 9 pg. 13.

³⁸ Archiv claustral Nossadunneun A SF (30) 9. Acts e recess dalla visitaziun 1776 pg. 13, 18, 21, 23 s.

³⁹ Sur igl entir fatg ei d'anflar pli bia tier I. Müller, Die Fürstabtei Disentis im ausgehenden 18. Jh. 1963, pg. 77, ss. specialmein pg. 158.

Muort la schliata disziplina monastica, che regeva lu en claustra, ei la congregaziun svizzera dils benedictins stada necessitada da dislocar la gronda part dil convent da Mustér. Aschia ei fr. Placi Spescha vegnius, nuidis avunda, igl onn 1776 ella claustra da *Nossadunneun*, per finir leu sia instrucziun monastic-teologica. Veseivla mein han ton il grond aszet P. Adelrich Kümin († 1782) sco era igl erudit P. Murezi Brodhag († 1826), omisdus ses magisters en filosofia e teologia, fatg gronda impressiun sin el. Spescha lauda aunc suenter decennis la instrucziun da P. Murezi en las «scienzas fisicas e moralas». Ultra da quei funcionava entochen 1781 P. Joh. Crisost Helbling sco instructer dils fraters, gest quel che ha introduciu a Nossadunneun la «Philosophia experimentalis» e che possedeva gia 1759 in excellent cabinet fisical. La sintesa denter veta monastica e scienzia ei pia buca mo vegnida mussada al fr. Placi ella claustra da s. Meinrad, anzi ella ei leu era rehamein vegnida praticada⁴⁰.

Cheu ella abbazia el «Stgir Uaul» ha Spescha scret sia *secunda scartira romontscha*. El sez ha circumscrit il cuntegn da quella igl onn 1804 sco suonda: «Doctrina de bein cultivar l'Olma, il Tgiorp e Beins temporals, quei ei instrucziun, co ver quitau della Olma, dil tgiorp e dils beins terresters. Sche jeu hai scret enzacu en mia veta enzatgei nizeivel, lu eis ei quei.» El cartevo da haver scret quei trac-tat «els onns 70»⁴¹. En sia autobiografia dat el a nus semigliont sclariment: «Ent ils devos ons de meia habitaziun lou hai iou skrit in' ovra paer memoria ed utilitat da meiea parentela de Trun; quaela partiui giu en treis kodishs e titulau aela: Doktrina de bein kultivar l'Olma, il tgiorp e beins temporals. Lou hai iou serecordau de las repraehensiuns d'il lungatg romansh fatgas en Quera, el Tirol et en Nossadonaun, e skrit cun novadonza et atenziun quael' ovra»⁴². Donn che quella ovra ei ida a piarder, pertgei ella para dad esser stada in cauld confess da sia patria, da siu lungatg e da sias isonzas. Ual la dimora egl jester ha fatg ord dad el in fervent patriot. E sch'ins

⁴⁰ Spescha 66, 368, 403 s., plinavon XI. Arriguard Helbling: R. Henggeler, Professbuch von Einsiedeln 1933, pg. 424 e G. Heer, Johann Mabillon und die Schweizer Benediktiner, 1938, pg. 314.

⁴¹ Spescha 65.

⁴² Autobiografia 675.

prendeva buca ual serius il lungatg matern romontsch da Spescha a Cuera, a Mals e Tartsch ed a Nossadunneun, gie figieva beffas sur da quel, sche ston ins buca emblidar, ch'ins haveva da quellas uras, el 18. Tschenstaner, strusch ina dretga idea dil romontsch, fegl dil latin vulgar. Spescha rapporta bein buca per nuot, che perfin igl aristocrat austriac, Avat Bernard Frank (1742—63), hagi vuliu eliminar il romontsch, semigliontamein sco pauc pli tard il plevon engiadines Heinrich Bansi (1754—1835)⁴³.

Entirs otg onns ei il giuven Spescha staus el liug da pelegrinadi el Stgir Uaul. Per cun 30 onns arriva el leu alla sava digl uffeci sacerdotal, daferton che ses confrars contonschan quella honur cun 25/26 onns. Spescha era per aschidedir ina clamada tardiva. Igl uorden obtegn el ils 25 de matg 1782, bein a Nossadunneun, dal nunzi papal. Ils 4 da zercladur ha el bandunau Nossadunneun per celebrar a Mustér sia messa nuviala. El ei vegnius accompignaus dal pader da Nossadunneun Eustachius Tonassini, oriunds dal Tessin, il qual era staus pli baul, 1772, a Mustér ed haveva empriu romontsch e che vegn era ad haver giu bunas relaziuns cun P. Placi. Ils 30 da zercladur retuornan ils dus conventuals puspei a Nossadunneun⁴⁴. Il settember dil medem onn (1782) ha P. Placi intermediau ils giavischs dil convent da Mustér agl avat de Nossadunneun⁴⁵. Sco ei para retractava ei da dispettas denter claustra e Cadi⁴⁶. Ils 25 de november 1782 ha P. Placi bandunau definitivamein Nossadunneun. Igl avat ha sco ei para era dau cun el ina brev, adressada al senat dalla Cadi, alla quala quel ha rispundi amicablamein⁴⁷.

⁴³ Spescha 60. Tier igl entir fatg ussa: I. Müller, Die sprachlichen Verhältnisse im Vorderrheintal im Zeitalter des Barocks, Bündner Monatsblatt 1960, pg. 273—316.

⁴⁴ Archiv claustral Nossadunneun, Diarium Beati Abbatis, copia, tom I, pg. 15, 17 tier ils 4 e 30 de zercladur 1782. Arriguard P. Eustachius mira R. Henggeler, Professbuch der Abtei Einsiedeln 1933 pg. 446.

⁴⁵ 1. c. pg. 21 tier settember 1782: Mirabiles animi agitationes et scripta P. Placidi Disertinensis monachi circa Monasterium Desertinense animadvertisse.

⁴⁶ 1. c. pg. 22: Die 25. Septmbris nos invisit Princeps Fabariensis Benedictus, cum quo multa de pace inter Monasteria nostra et Statu Disertinensi locutus sum.

⁴⁷ 1. c. pg. 27 als 25 de nov. 1782: Abs Eremo discessit P. Placidus ex Dissentis. Litterae notandae ad Senatum Dissertinensem, a quo et bonae spei responsorias accepi.

Cul retuorn da P. Placi a Mustér igl onn 1782 ei siu svilupp giu-
venil concludius. Ussa ha el éntschet sa propria activitat en biars
uffecis e missiuns, mo era sias prestaziuns sin intschess dalia geo-
grafia culturala e dalla historia naturala. Quellas darivan da duas
periodas, l'emprema da 1782—1799, la secunda da 1799 tochen
sia mort 1833. Igl ei gia vegniu scret da bia sur da quellas duas parts
da sia veta⁴⁸. Denton, tier ina cumpleina e clara biografia sto
aunc bein encual caussa ord sia veta vegnir tschaffada pli bein, cun-
zun sia tenonza e sia lavur duront la secunda epoca, pia suenter igl
exil ad Innsbruck.

⁴⁸ La lavur da Pieth-Hager, P. Placidus a Spescha, 1913 pg. XI s. resta fundamen-
tala. Cheutier comp. I. Müller, en: Schweizer Rundschau 46 (1946/47) pg. 771—
782 sco era I. Müller, Die Fürstabtei Disentis im ausgehenden 18. Jh., 1963
pg. 222—229.